

四庫全書

集部

欽定四庫全書

集部

曹子建集卷一至六

詳校官監察御史臣曹錫寶

檢討臣何思鈞覆勘

總校官庶吉士臣倉聖脉

校對官編修臣繆晉

謄錄監生臣方春澍

欽定四庫全書

集部二

曹子建集

別集類一魏

提要

臣等謹案曹子建集十卷魏曹植撰案魏志植本傳景初中撰錄植所著賦頌詩銘禠論凡百餘篇副藏內外隋書經籍志載陳思王集三十卷唐書藝文志作二十卷而注其下曰又三十卷蓋三十卷者隋時舊本二十卷

者為後來合併重編實無兩集鄭樵作通志
畧亦併載二本焦竑作國史經籍志遂合二
本卷數為一稱植集為五十卷謬之甚矣陳
振孫書錄解題亦作二十卷然振孫謂其間
頗有采取御覽書鈔類聚中所有者則摭摭
而成已非唐時二十卷之舊文獻通考作十
卷又併非陳氏著錄之舊此編原本題有嘉
定六年癸酉字猶從宋寧宗時本翻雕蓋即

通考所載也凡賦四十四篇詩七十四篇禘
文九十二篇合計之得二百十篇較魏志所
錄百餘篇者其數轉溢然殘篇斷句錯出其
間如鷓鴣雀蝙蝠二賦均採自藝文類聚中藝
文類聚之例皆標某人某文曰云云編是集
者遂以曰字為正文連於賦之首句殊為失
考又七哀詩晉人採以入樂增減其詞以就
音律見宋書樂志中此不載其本詞而載其

入樂之本亦為舛謬棄婦篇見玉臺新詠亦見太平御覽鏡銘八字反覆顛倒皆叶韻成文寔為回文之祖見藝文類聚皆棄不載而善哉行一篇諸本皆作古詞乃悞為植作不知其下所載當來日大難即當此篇也使此為植作將自作之而自擬之乎至於王宋妻詩藝文類聚作魏文帝詩邢凱坦齋通編據舊本新詠作植詩今本玉臺新詠又作王宋

自賦之詩即衆說異同亦宜附載以備參考
乃竟遺漏亦為疏畧不得謂之善本然唐以
前舊本既佚後來刻植集者率以是編為祖
本別無更古於斯者錄而存之亦不得已而
思其次也乾隆四十三年七月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--

欽定四庫全書

曹子建集卷一

魏
曹植
撰

東征賦

建安十九年王師東征吳寇余典禁兵衛宮省然神
武一舉東夷必克想見振旅之盛故作賦一篇

登城隅之飛觀兮望六師之所營
幡旗轉而心異兮舟楫動而傷情
顧身微而任顯兮愧任重而命輕
嗟我愁

其何為兮心遙思而懸旌師旅憑皇穹之靈佑兮亮元
勲之必舉揮朱旗以東指兮橫大江而莫御循戈櫓於清
流兮汎雲梯而容與禽元帥於中舟兮振靈威於東野

游觀賦

靜閒居而無事將遊目以自娛登北觀而啓路涉雲際
之飛除從羆熊之武士荷長戟而先驅罷若雲歸會如
霧聚車不及回塵不獲舉奮袂成風揮汗如雨

懷親賦

濟陽南澤有先帝故營遂停駕造斯賦焉

獵平原而南驚覩先帝之舊營步壁壘之常制識旌旗之所停在官曹之典列心髣髴於平生回驥首而永游赴修途以尋遠情眷戀而顧懷魂須臾而九反

玄暢賦

夫富者非財也貴者非寶也或有輕爵祿而重榮聲者或有反性命而徇功名者是以孔老異情楊墨殊義聊作賦名曰玄暢

夫何希世之大人罄天壤而作皇該仁聖之上義據神位以統方補五常之漏闕綴三代以維綱僥余生之倖祿邁九二之嘉祥上同契於稷高降合穎於伊望思薦寶以繼佩怨和璞之始鑄思黃鍾以協律怨伶夔之不存嗟所圖之莫合悵蘊結而延佇希鵬舉以搏天蹶青雲而奮羽企駟躍而改駕任中材之展御望前軌而致策顧後乘而安驅匪逞邁之短脩長全貞而保素弘道德以為宇築無怨以作藩播慈惠以為圃畊柔順以為田不媿景

而慚魄言樂天之何欲逸十載而流聲超遺黎而度俗
幽思賦

倚高臺之曲隅處幽僻之間深望翔雲之悠悠羗朝霧
而夕陰顧秋華而零落感歲莫而傷心觀躍魚於南沼
聆鳴鶴於北林搦素筆而慷慨揚大雅之哀吟仰清風
以嘆息寄余思於悲絃信有心而在遠重登高以臨川
何余心之煩錯寧翰墨之能傳

節遊賦

覽宮宇之顯麗實大人之攸居建三臺於前處飄飛陞
以凌虛連雲閣以遠徑營觀榭於城隅亢高軒以回眺
緣雲霓而結䟽仰西嶽之崧岑臨漳滏之清渠觀靡靡
而無終何渺渺而難殊亮靈后之所處非吾人之所廬
於是仲春之月百卉叢生萋萋藹藹翠葉朱莖竹林菁
蔥珍果含榮凱風發而時鳥謹微波動而水蟲鳴感氣
運之和順樂時澤之有成遂乃浮素蓋御驂騶命友生
携同儔誦風人之所嘆遂駕言而出遊步北園而馳騫

庶翱翔以解憂望洪池之滉漾遂降集乎輕舟浮沉蟻
於金罍行觴爵於好速絲竹發而響厲悲風激於中流
且容與以盡觀聊永日而忘愁嗟義和之奮迅怨曜靈
之無光念人生之不永若春日之微霜諒遺名之可紀
信天命之無常愈志蕩以淫游非經國之大綱罷曲宴
而旋復遂言歸乎舊房

感節賦

携友生而游觀盡賓主之所求登高墉以永望冀消日

以忘憂欣陽春之潛潤樂時澤之惠休望候鴈之翔集
想玄鳥之來游嗟征夫之長勤雖處逸而懷愁懼天河
之一回沒我身乎長流豈吾鄉之足顧戀祖宗之靈丘
唯人生之忽過若鑿石之未燿慕牛山之哀泣懼平仲
之我笑折若革之翳日庶朱光之常照願寄軀於飛蓬
乘陽風之遠飄亮吾志之不從乃拊心以嘆息青雲鬱
其西翔飛鳥翩而止匿欲縱體而從之哀余身之無翼
大風隱其四起揚黃塵之冥冥鳥獸驚以求羣草木紛

其揚英見遊魚之泫灑感流波之悲聲內紆曲而潛結
心怛惕以中驚匪榮德之累身恐年命之早零慕歸全
之明義庶不忝其所生

離思賦

建安十六年大軍西討馬超太子留監國植時從焉
意有憶戀遂作離思賦云

在肇秋之嘉月將耀師而西旗余抱疾以賓從扶衡軫
而不怡慮征期之方至傷無階以告辭念慈君之光惠

庶沒命而不疑欲畢力於旌麾將何心而遠之願我君
之自愛為皇朝而寶已水重深而魚悅林修茂而鳥喜

釋思賦

家弟出養族父郎中伊予以兄弟之愛心有戀然作
此賦以贈之

彼朋友之離別猶求思乎白駒况同生之義絕重背親
而為疎樂鴛鴦之同池羨比翼之共林亮根異其何戚
痛別榦之傷心

臨觀賦

登高墉兮望四澤臨長流兮送遠客春風暢而氣通靈
草含幹兮木交莖丘陵崛兮松柏青南園夢兮果載榮
樂時物之逸豫悲予志之長違歎東山之游勤歌式微
以詠歸進無路以効功退無隱以營私俯無鱗以遊遁
仰無翼以飈飛

曹子建集卷一

欽定四庫全書

曹子建集卷二

魏 曹植 撰

潛志賦

潛大道以遊志希往昔之遐烈矯貞亮以作失當苑囿
之呈藝驅仁義以為禽必信忠而後發退隱身以滅跡
進出世而取容且摧剛而和謀接虔肅以靜恭亮知榮
而守辱匪狗天以為通

閒居賦

何吾人之介特去朋匹而無儔出靡時以娛志入無樂
以消憂何歲月之若鶩復民生之無常感陽春之發節
聊輕駕之遠翔登高丘以延企時薄暮而起雨仰歸雲
以載奔遇蘭蕙之長圃冀芬芳之可服結春衡以延佇
入虛廊之閒館步生風之高廡踐密邇之修除即蔽景
之玄宇翡翠翔於南枝玄鶴鳴於北野青魚躍於東沼
白鳥戲於西渚遂乃背通谷對綠波藉文茵翳春華丹

轂更馳羽騎相過

慰子賦

彼凡人之相親小離別而懷戀况中殤之愛子乃千秋
而不見入空室而獨倚對孤幃而切嘆痛人亡而物在
心何忍而復觀日晡晚而既没月代照而舒光仰列星
以至晨衣霑露而含霜惟逝者之日遠愴傷心而絕腸

叙愁賦

時家二女弟故漢皇帝聘以為貴人家母見二弟愁

思故令予作賦曰

嗟妾身之微薄信未達乎義方遭母氏之聖善奉恩化
之彌長迄盛年而始立脩女職於衣裳承師保之明訓
誦六列之篇章觀圖像之遺形竊庶幾乎英皇委微軀
於帝室充末列於椒房荷印紱之令服非陋才之所望
對牀帳而太息慕二親以增傷揚羅袖而掩涕起出戶
而彷徨顧堂宇之舊處悲一別之異鄉

愁思賦

四節更王兮秋氣悲遙思愴恍兮若有遺原野蕭條兮
煙無依雲高氣靜兮露凝璣野草變色兮莖葉稀鳴蜩
抱木兮鴈南飛歸室解裳兮步庭前月光照懷兮星依
天居一世兮芳景遷松喬難慕兮誰能仙長短命也兮
獨何愆

九愁賦

嗟離思之難忘心慘毒而含哀踐南畿之末境越引領
之徘徊睠浮雲以太息顧攀登而無階匪徇榮而愉樂

信舊都之可懷恨時王之謬聽受奸枉之虛辭揚天威以臨下忽放臣而不疑登高陵而反顧心懷愁而荒悴念先寵之既隆哀後施之不遂雖危亡之不豫亮無遠君之心刈桂蘭而秣馬舍余車於西林願接翼於歸鴻嗟高飛而莫攀因流景而寄言響一絕而不還傷時俗之趨險獨悵望而長愁感龍鸞而匿跡如吾身之不留竄江介之曠野獨眇眇而沉舟思孤客之可悲改予身之翩翔豈天監之孔明將時運之無常謂內思而自策

筭乃昔之愆殃以忠言而見黜信母負於時王俗參差而不齊豈毀譽之可同競昏瞶以營私害予身之奉公共朋黨而妬賢俾予濟乎長江嗟大化之移易悲性命之攸遭愁慙慙而繼懷怛慘慘而情挽曠年載而不回長去君兮悠遠御飛龍之蜿蜒揚翠霓之華旌絕紫霄而高鶩飄弭節於天庭披輕雲而下觀覽九土之殊形顧南郢之邦壤咸蕪穢而倚傾驂盤桓而思服仰御驤以悲鳴紆予袂而收涕僕夫感以失聲履先王之正路

豈淫徑之可遵知犯君之招咎耻干媚而求親顧旋復
之無軌長自棄於遐濱與麋鹿以為羣宿林藪之歲蒸
野蕭條而極望曠千里而無人民生期於必死何自苦
以終身寧作清水之沉沉不為濁路之飛塵踐蹊隧之
危阻登峒堯之高岑見失羣之離獸覲偏棲之孤禽懷
憤激以切痛苦回忍之在心愁戚戚其無為遊綠林而
逍遙臨白水以悲嘯猿驚聽以失條亮無怨而棄逐乃
余行之所招

娛賓賦

遂衍賓而高會兮丹幃暉以四張
辦中厨之豐膳兮作齊鄭之妍倡
文人騁其妙說兮飛輕翰而成章
談在昔之清風兮摠賢聖之紀綱
欣公子之高義兮德芬芳其若蘭
揚仁恩於白屋兮踰周公之棄餐
聽仁風以忘憂兮美酒清而肴甘

愍志賦

或人有好鄰人之女者時無良媒禮不成焉彼女遂

行適人有言之於予者予心感焉乃作賦曰

竊托音於往昔迄來春之不從思同遊而無路情壅隔
而靡通哀莫哀於永絕悲莫悲於生離豈良時之難俟
痛予質之日虧登高樓以臨下望所歡之攸居去君子
之清宇歸小人之蓬廬欲輕飛而從之迫禮防之我拘

歸思賦

背故鄉而遷徂將遙憇乎北濱經平常之舊居感荒壤
而莫振城邑寂以空虛草木穢而荆蓀嗟喬木之無陰

處原野其何為信樂土之足慕忽并日之載馳

靜思賦

夫何美女之爛妖紅顏暉而流光卓特出而無匹呈才好其莫當性通暢以聰慧行嬾密而妍詳蔭高岑以翳日臨綠水之清流秋風起於中林離鳥鳴而相求愁慘慘以增傷悲予安能乎淹留

曹子建集卷二

欽定四庫全書

曹子建集卷三

魏 曹植 撰

感婚賦

陽氣動兮淑清百卉鬱兮含英春風起兮蕭條蟄蟲出
兮悲鳴顧有懷兮妖嬈用搔首兮屏營登清臺以蕩志
伏高軒而游情悲良媒之不顧懼歡媾之不成慨仰首
而太息風飄飄以動纓

出婦賦

以才薄之陋質奉君子之清塵承顏色以接意恐疎賤
而不親悅新婚而忘妾哀愛惠之中零遂摧顏而失望
退幽屏於下庭痛一旦而見棄心忉忉以悲驚衣入門
之初服背床室而出征攀僕御而登車左右悲而失聲
嗟冤結而無訴乃愁苦以長窮恨無愆而見棄悼君施
之不終

洛神賦

黃初三年余朝京師還濟洛川古人有言斯水之神
名曰宓妃感宋玉對楚王神女之事遂作斯賦其詞

曰

余從京城言歸東藩背伊闕越轅轅經通谷陵景山日

既西傾車殆馬煩爾乃稅駕乎衡臯秣駟乎芝田容與

乎陽一作楊林流眇乎洛川於是情移神駭忽焉思散俯

則未察仰以殊觀覩一麗人於岩之畔迺援御者而告

之曰爾有覲於彼者乎彼何人斯若此之艷也御者對

曰臣聞河洛之神名曰宓妃然則君王之所見也無奈

一作

是乎其狀若何臣願聞之余告之曰其形也翩若

驚鴻婉若游龍榮曜秋菊華茂春松髣髴兮若輕雲之

蔽月飄颻兮若流風之回雪遠而望之皎若太陽升朝

霞迫而察之灼若芙蓉

一作蕖

出淶波穠纖得衷

一作脩

短合度肩若削成腰如約素延頸秀項皓質呈露芳澤

無加鉛華弗御雲髻我我脩眉聯娟丹唇外朗皓齒內

鮮明眸善睐靨輔承權瓌姿艷逸儀靜體閒柔情綽態

媚於語言奇服曠世骨像應圖披羅衣之璀璨兮珥瑤
碧之華裾戴金翠之首飾綴明珠以耀軀踐遠遊之文
履曳霧綃之輕裾微幽蘭之芳藹兮步踟躕於山隅於
是忽焉縱體以遨以嬉左倚采旄右陰桂旗攘皓腕於
神澣兮采湍瀨之玄芝余情悅其淑美兮心振蕩而不
怡無良媒以接歡兮托微波而通辭願誠素之先達兮
解玉珮以要之嗟佳人之信修兮羗習禮而明詩抗瓊瑤
以和予兮指潛淵而為期執眷眷之款實兮懼斯靈之

我欺感交甫之棄言兮悵猶豫而狐疑收和顏而靜志
兮申禮防以自持於是洛靈感焉徙倚徬徨神光離合
乍陰乍陽竦輕軀以鶴立若將飛而未翔踐椒塗之郁
烈步蘅薄而流芳超長吟以永慕兮聲哀厲而彌長爾
迺衆靈雜遝命儔嘯侶或戲清流或翔神渚或採明珠
或拾翠羽從南湘之二妃携漢濱之遊女嘆匏瓜之無
匹兮詠牽牛之獨處揚輕袿之猗一作綺靡兮翳脩袖以
延佇體迅飛鳧飄忽若神凌波微步羅襪生塵動無常

則若危若安進止難期若往若還轉盼流精光潤玉顏
含辭未吐氣若幽蘭華容婀娜令我忘餐於是屏翳收
風川后靜波馮夷鳴鼓女媧清歌騰文魚以警乘鳴玉
鑿以偕逝六龍儼其齊首載雲車之容裔鯨鯢踊而夾
轂水禽翔而為衛於是越北泚過南岡紆素領回清揚
動朱唇以徐言陳交接之大綱恨人神之道殊兮怨盛
年之莫當抗羅袂以掩涕兮淚流襟之浪浪悼良會之
永絕兮哀一逝而異鄉無微情以效愛兮獻江南之明

璫雖潛處於太陰長寄心於君王忽不悟其所舍悵神
霄而蔽光於是背下陵高足往神留遺情想像顧望懷
愁冀靈體之復形御輕舟而上泝浮長川而忘反思綿
綿而增慕夜耿耿而不寐霑繁霜而至曙命僕夫而就
駕吾將歸乎東路覽駢轡以抗策悵盤桓而不能去

愁霖賦

迎朔風而爰邁兮雨微微而速行悼朝陽之隱暉兮怨
北辰之潛精車結轍以盤桓兮馬躑躅以悲鳴攀扶桑

而仰觀兮假九日於天皇
瞻沈雲之泱泱兮哀吾願之
不將又曰夫季秋之淫雨兮
既彌日而成霖瞻玄雲之
晻晻兮聽長空之淋淋中宵
卧而歎息起飾帶而撫琴

喜霽賦

禹身逝於暘旰卒錫圭而告成
湯感旱於殷時造桑林
而敷誠動玉朝而雲披鳴鑿鈴
而日陽指北極以為期吾
將倍道而兼行

登臺賦

從明后之嬉遊聊登臺以娛情見天府之廣開觀聖德
之所營建高殿之嵯峨浮雙闕乎太清立沖天之華觀
連飛閣乎西城臨漳川之長流望衆果之滋榮仰春風
之和穆聽百鳥之悲鳴天功怛其既立家願得而獲呈
揚仁化於宇內盡肅恭於上京雖桓文之為盛豈足方
乎聖明休矣美矣惠澤遠揚翼佐皇家寧彼四方同天
地之矩量齊日月之輝光

九華扇賦

昔吾先君常侍得幸漢桓帝賜尚方扇不方不圓其中結成文名曰九華其辭曰

有神區之名竹生不周之高岑對綠水之素波背玄澗之重深體虛暢以立幹播翠葉以成林形五離而九華箴薰解而縷分效九龍之蜿蜒法虹霓之氤氳因形致好不常厥儀方不應矩圓不中規隨皓腕以徐轉發惠風之微寒時氣清以方厲紛飄動兮綺紈

寶刀賦

建安中魏王命有司造寶刀五枚以龍虎熊馬雀為
識太子得一余及余弟饒陽侯各得一馬其餘二枚
家王自用之賦曰

有皇漢之明后思潛達而玄通飛文義以博致揚武備
以禦凶乃熾火炎爐融鉄挺英烏獲奮椎歐冶是營扇
景風以激氣飛光鑑於天庭爰告祠於太乙乃感夢而
通靈然後礪以五方之石鑿以中黃之壤規員景以定
環攄神思而造像垂華紛之歲蕤流翠采之晷燿陸斬

犀革水斷龍舟輕擊浮截刃不灑流踰南越之巨闕起
有楚之泰阿寔真人之攸遇永天祿而是荷

車渠椀賦

惟新椀之所生于涼風之浚湄采金光之定色擬朝陽
而發輝豐玄素之曄曄帶朱榮之歲蕤緼絲綸以肆采
藻繁布以相追翩飄颻而浮景若驚鵠之雙飛隱神璞
於西野彌百葉而莫希于時乃有篤厚神后廣被仁聲
夷慕義而重使獻茲寶於斯庭命公輸之巧匠窮妍麗

之殊形華色燦爛文若點成鬱蒼雲蒸蜿蜒龍征光如
激電影若浮星何神怪之巨偉信一覽而九驚雖離朱
之聰目內炫耀而失精何明麗之可悅超羣寶而特章
俟君子之閒燕酌甘醴於斯觥既娛情而可貴故永御
而不忘

迷迭香賦

播西都之麗草兮應青春而凝暉流翠葉於纖柯兮結
微根於丹墀信繁華之速實兮弗見凋於嚴霜芳莫秋

之幽蘭兮麗崑崙之芝英既經時而收采兮遂幽殺以
增芳去枝葉而特御兮入綃縠之霧裳附玉體以行止
兮順微風而舒光

大暑賦

炎帝掌節祝融司方羲和按轡南雀舞衡蛇折鱗於靈
窟龍解角於皓蒼遂乃溫風赫戲草木垂榦山折海沸
沙融礫爛飛魚躍渚潛龜浮岸鳥張翼而近栖獸交遊
而雲散于時黎庶徒倚綦布葉分機女絕綜農夫釋耘

背暑者不羣而齊跡向陰者不會而成羣於是大人遷
居宅幽綏神育靈雲屋重構閒房肅清寒泉涌流玄木
奮榮積素冰於幽館氣飛結而為霜奏白雪於琴瑟朔
風感而增涼

曹子建集卷三

欽定四庫全書

曹子建集卷四

魏 曹植 撰

神龜賦

龜壽千歲時有遺余龜者數日而死肌肉消盡唯甲
存焉余感而賦之曰

嘉四靈之建德各潛位乎一方蒼龍虬於東嶽白虎嘯
於西崗玄武集於寒門朱雀棲於南鄉順仁風以消息

應聖時而後翔嗟神龜之奇物體乾坤之自然下夷方以則地上規隆而法天順陰陽以呼吸藏景曜於重泉餐飛塵以實氣飲不竭於朝露步容趾以俯仰時鸞回而鶴顧忽萬載而不恤周無疆於太素感白龍之翔翥卒不免乎豫且雖見珍於宗廟罹剝剝之重辜欲愬怨於上帝將等愧乎游魚懼沈泥之逢殆赴芳蓮以巢居安玄雲而好靜不淫翔而改度昔嚴周之抗節援斯靈而托喻嗟祿運之屯蹇終遇獲於江濱歸籠檻以幽處

遭淳美之仁人晝顧瞻以終日夕撫順而接晨遘淫災
以殞越命勦絕而不振天道昧而未分神明幽而難燭
黃氏沒於空澤松喬化於株木虵折鱗於平皋龍脫骨
於深谷亮物類之遷化疑斯靈之解殼

白鶴賦

嗟皓麗之素鳥兮含竒氣之淑祥薄幽林以屏處兮陰
重景之餘光狹單巢於弱條兮懼衝風之難當無沙棠
之逸志兮欣六翮之不傷承邂逅之僥倖兮得接翼於鸞

凰同毛衣之氣類兮信休息之同行痛美會之中絕兮
邁嚴穴而逢殃共太息而祇懼兮抑吞聲而不揚傷本
規之違忤悵離羣而獨處恒竄伏以窮栖獨哀鳴而戢
羽翼大綱之難結得奮翅而遠遊聆雅琴之清韻託六
翮之末流

蟬賦

唯夫蟬之清素兮潛厥類乎太陰在盛陽之仲夏兮始
遊豫乎芳林實澹泊而寡慾兮獨怡樂而長吟聲皦皦

而彌厲兮似貞士之介心內含和而弗食兮與衆物而
無求棲高枝而仰首兮賴朝露之清流隱柔桑之稠葉
兮快啁號以遁暑苦黃雀之作害兮患螳螂之勁斧冀
飄翔而遠托兮毒蜘蛛之網罟欲降身而卑竄兮懼草
蟲之襲予免衆難而弗獲兮遙遷集乎宮宇依名果之
茂陰兮托脩榦以靜處有翩翩之狡童兮步容與於園
圃體離朱之聰視兮姿才捷於獼猿條罔葉而不挽兮
樹無榦而不緣翳輕驅而奮進兮跪側足以自閑恐余

身之驚駭兮精曾睨而目連持柔竿之冉冉兮運微黏
而我纏欲翻飛而逾滯兮知性命之長捐亂曰詩歎鳴
蜩聲嘒嘒兮盛陽則來大陰逝兮皎皎貞素侔夷節兮
帝臣是戴尚其潔兮

鸚鵡賦

美中州之令鳥越衆類之殊名感陽和而振翼遁太陰
以存形遇旅人之嚴網殘六翮之無遺身挂滯於重籠
孤雌鳴而獨歸豈予身之足惜憐衆雛之未飛分糜軀

以潤鑊何全濟之敢希蒙含育之厚德奉君子之光輝
怨身輕而施重恐往惠之中虧常戢心以懷懼雖處安
其若危永哀鳴其報德庶終來而不疲

鷓鴣賦

鷓鴣之為禽猛氣共鬪終無勝負期於必死遂賦之焉

美遐圻之偉鳥生大行之崑阻體貞剛之烈性亮金德之所
輔戴毛角之雙立揚玄黃之勁羽其沈墮而重辱有節士
之儀矩降居檀澤高處保岑遊不同嶺棲必異林若有翻

雄駭逝孤雌驚翔則長鳴挑敵鼓翼專場踰高越壑雙不
隻僵階侍斯珥俯耀文墀成武官之首飾增庭燎之高輝

離繳鴈賦

余游於武陵中有鴈離繳不能復飛顧命舟人追而
得之故憐而賦焉

憐孤鴈之偏特情惆焉而內傷尋淑類之殊異兮稟上
天之休祥含中和之純氣赴四節而征行遠玄冬於南
裔兮避炎夏於朔方白露淒以飛兮秋風發乎西商感節

運之復至今假魏道而翱翔接羽翮以南北兮情逸豫而永康望范氏之發機兮播纖繳以凌雲挂微軀之輕翼兮忽頽落而離羣旅朋驚而鳴逝兮徒矯首而莫聞甘充君之下厨膏函牛之鼎鑊蒙生全之顧復何恩施之隆溥於是縱軀歸命無慮無求飢食稻粱渴飲清流

鷓鴣賦

鷓欲取雀雀言雀微賤身卑些小肌肉瘠瘦所得蓋少君欲相噉實不足飽鷓得雀言初不敢語頃來轆軻

資糧乏旅三日不食略思死鼠今日相得寧復置汝雀
得鷄言意甚怔營性命至重雀鼠貪生君得一食我命
是傾皇天降鑑賢者是聽鷄得雀言意甚怛惋當死斃
雀頭如果蒜不早首服烈頸大喚行人聞之莫不往觀
雀得鷄言意甚不移目如擘椒跳蕭二翅我當死矣略
無可避鷄乃置雀良久方去二雀相逢似是公姬相將
入草共上一樹仍叙本末辛苦相語向者近出為鷄所捕
賴我翻捷體素便附說我辨語千條萬句欺恐舍長令

兒大怖我之得免復勝於兔自今徙意莫復相妬

蝙蝠賦

吁何奸氣生茲蝙蝠形殊性詭每變常式行不由足
飛不假翼明伏暗動盡似鼠形謂鳥不似二足為毛飛
而含齒巢不哺殼空不乳子不容毛羣斥逐羽族下不
蹈陸上不馮木

芙蓉賦

覽百卉之英茂無斯華之獨靈結脩根於重壤泛清流

而濯莖其始榮也皦若夜光尋扶桑其揚暉也晃若九
陽出暘谷芙蓉蹇產菡萏星屬絲條垂珠丹榮吐綠焜
焜鞞鞞爛若龍燭觀者終朝情猶未足於是狡童媛女
相與同遊擢素手於羅袖接紅葩於中流

酒賦

余覽揚雄酒賦辭甚瑰瑋頗戲而不雅聊作酒賦粗
究其終始賦曰

嘉儀氏之造思亮茲美之獨珍仰酒旗之景曜協嘉號

於天辰穆生以醴而辭楚侯嬴感爵而輕身其味有宜
城醪醴蒼梧縹清或秋藏冬發或春醞夏成或雲沸潮
涌或素蟻浮萍爾乃王孫公子遊俠翺翔將承芬以接
意會陵雲之朱堂獻酬交錯宴笑無方於是飲者並醉
縱橫誼譁或揚袂屢舞或扣劍清歌或嘖嘖辭觴或奮
爵橫飛或歌驪駒既駕或稱朝露未晞於斯時也質者
或文剛者或仁卑者忘賤窶者忘貧於是矯俗先生聞
之而歎曰噫夫言何容易此乃淫荒之源非作者之事

若耽于觴酌流情縱逸先王所禁君子所斥

槐賦

羨良木之華麗爰獲貴於至尊憑文昌之華殿森列峙
乎端門觀朱櫜以振條據文陛而結根暢沉陰以溥覆
似明后之垂恩在季春以初茂踐朱夏而乃繁覆陽精
之炎景散流耀以增鮮

植橘賦

有朱橘之珍樹于鶉火之遐鄉稟太陽之烈氣嘉杲日

之休光體天然之素分不遷徙于殊方播萬里而遙植
列銅爵之園庭背江川之暖氣處玄朔之肅清邦換壤
別爰幾喪生處彼不凋在此先零朱實不啣焉得素榮
惜寒暑之不均嗟華實之永乖仰凱風以傾葉異炎氣
之所懷颺鳴條以流響希越鳥之來栖夫靈德之所感
物無微而不和神蓋幽而易激信地道之不訛既萌根
而弗榦諒結葉而不華漸玄化而弗變非彰德於邦家
附微條以嘆息哀草木之難化

述行賦

尋曲路之南隅觀秦政之驪墳哀黔首之罹毒酷始皇
之為君濯余身於秦井

溫泉也

律湯液之若焚

曹子建集卷四

欽定四庫全書

曹子建集卷五

魏 曹植 撰

公宴

公子敬愛客終宴不知疲清夜遊西園飛蓋相追隨
明月澄清影列宿正參差秋蘭被長坂朱華冒綠池
潛魚躍清波好鳥鳴高枝神飈接丹轂輕輦隨風移
飄飄放志意千秋長若斯

侍太子坐

白日曜青春時雨靜飛塵寒冰辟炎景涼風飄我身清
醴盈金觴餽饌縱橫陳齊人進竒樂歌者出西秦翩翩
我公子機巧忽若神

七哀

明月照高樓流光正徘徊上有愁思婦悲歎有餘哀借
問歎者誰言是宓子妻君行踰十年孤妾常獨棲君若
清路塵妾若濁水泥浮沉各異勢會合何時諧願為西

南風長逝入君懷
君懷良不開
賤妾當何依

鬪鷄

遊目極妙伎
清聽厭宮商
主人寂無為
衆賓進樂方
長筵坐戲客
鬪鷄觀閨房
羣雄正翕赫
雙翅自飛揚
揮羽邀清風
悍目發朱光
背落輕毛散
嚴距往往傷
長鳴入青雲
扇翼獨翱翔
願蒙狸膏助
常得擅此場

元會

初歲元祚吉日惟良
乃為佳會宴此高堂
衣裳鮮潔黼

黻玄黃珍膳雜環充溢圓方俯視文軒仰瞻華梁願保
茲善千載為常歡笑盡娛樂哉未央皇家榮貴壽考無
疆

送應氏二首

步登北邙

一作芒

阪遙望洛陽山洛陽何寂寞宮室盡燒

焚垣墻皆頓擗荆棘上叅天不見舊耆老但覩新少年

側足無行逕荒疇不復田遊子久不歸不識陌與阡中

野何蕭條千里無人煙念我平生親

一作常居

氣結不能言

又

清時難屢得嘉會不可常天地無終極人命若朝霜願
得展嫵婉我友之朔方親昵並集送置酒此河陽中饋
豈獨薄賓飲不盡觴愛至望苦深豈不愧中腸山川阻
且遠別促會日長願為比翼鳥施翮起高翔

雜詩六首

高臺多悲風朝日照北林之子在萬里江湖迥且深方
舟安可極離思故難任孤鴈飛南游過庭長哀吟翹思

慕遠人願欲托遺音形影忽不見翩翩傷我心

其二

轉蓬離本根飄颻隨長風何意迴颺舉吹我入雲中高
高上無極天路安可窮類此游客子捐軀遠從戎毛褐
不掩形薇藿常不充去去莫復道沈憂令人老

其三

西北有織婦綺縞何繽紛明晨秉機杼日昃不成文太
息終長夜悲嘯入青雲妾身守空閨良人行從軍自期

三年歸今已歷九春飛鳥遶樹翔噉噉鳴索羣願為南
流景馳光見我君

其四

南國有佳人容華若桃李朝游北海

一作江北

岸夕宿瀟湘

止時俗薄朱顏誰為發皓齒俯

一作俛

仰歲將暮榮耀難

久恃

其五

僕夫早嚴駕吾行將遠遊遠遊欲何之吳國為我仇將

騁萬里塗東路安足由江介多悲風淮泗馳急流願欲
一輕濟惜哉無方舟閒居非吾志甘心赴國憂

其六

飛觀百餘尺臨牖御櫺軒遠望周千里朝夕見平原烈
士多悲心小人媮一作偷自閔國讎亮不塞甘心思喪元

拊劍西南望思欲赴太山絃急悲聲發聆我慷慨言

喜雨

天覆何彌廣苞育此羣生棄之必憔悴惠之則滋榮慶

雲從北來鬱述西南征時雨中夜降長雷周我廷喜種
盈膏壤登秋必有成

離友

鄉人有夏侯威者少有成人之風余尚其為人與之
昵好王師振旅送予于魏邦心有眷然為之隕涕乃
作離友之詩其辭曰

王旅遊兮背故鄉彼君子兮篤人綱
滕予行兮歸朔方
馳原隰兮尋舊疆
車載奔兮馬繫驤
涉浮濟兮泛輕航

金匱要略卷五
卷五
迄魏都兮息蘭房展宴好兮惟樂康

應詔

肅承明詔應會皇都星陳夙駕秣馬脂車命彼掌徒肅
我征旅朝發鸞臺夕宿蘭渚芒芒原隰祁祁士女經彼
公田樂我稷黍爰有樛木重陰匪息雖有餽糧飢不遑
食望城不過面邑不游僕夫警策平路是由玄駟藹藹
揚鑣漂沫流風翼衡輕雲承蓋涉澗之濱緣山之隈遵
彼河澨黃坂是階西濟關谷或降或升駢駘倦路載寢

載興將朝聖皇匪敢晏寧弭節長驚指日遙征前驅舉
燧後乘抗旌輪不輟運鸞無廢聲爰暨帝室稅此西墉
嘉詔未賜朝覲莫從仰瞻城闕俯惟闕庭長懷永慕憂
心如醒

贈徐幹

驚風飄白日忽然歸西山圓景光未滿衆星粲以繁志
士營世業小人亦不閒聊且夜行游游彼雙闕間文昌
鬱雲興迎風高中天春鳩鳴飛棟流焱激櫺軒顧念蓬

室士貧賤誠足憐薇藿弗充虛被褐猶不全慷

一作慨

有悲心興文自成篇寶棄怨何人和氏有其愆彈冠俟
知己知己誰不然良田無晚歲膏澤多豐年亮懷璠璣
美積久德逾宣親交義在敦申章復何言

贈丁儀

初秋涼氣發庭樹微銷落凝霜依玉除清風飄飛閣朝
雲不歸山霖雨成川澤黍稷委疇隴農夫安所獲在貴
多忘賤為恩誰能博狐白足禦冬焉念無衣客思慕延

陵子寶劍非所惜子其寧爾心親交義不薄

贈王粲

端坐苦愁思攬衣起西遊樹木發春華清池激長流中
有孤鴛鴦哀鳴求匹儔我願執此鳥惜哉無輕舟欲歸
忘故道顧望但懷愁悲風鳴我側義和逝不留重陰潤
萬物何懼澤不周誰令君多念遂一作自使懷百憂

贈丁儀王粲

從軍度函谷驅馬過西京山岑

一作峯

高無極涇渭揚濁

清壯哉帝王居住麗殊百城負闕出浮雲承露槩泰清
皇佐揚天惠四海無交兵權家雖愛勝全國為令名君
子在末位不能歌德聲丁生怨在朝王子歡自營難一作
歡怨非貞則中和誠可經

贈白馬王彪

謁帝承明廬逝將歸舊疆清晨發皇邑日夕過首陽伊
洛廣且深欲濟川無梁汎舟越洪濤怨彼東路長顧瞻
戀城闕引領情內傷太谷何寥廓山樹鬱蒼蒼霖雨泥

我塗流潦浩縱橫中達絕無軌改轍登高崗修坂造雲
日我馬玄以黃玄黃猶能進我思鬱以紆鬱紆將難進
親愛在離居本圖相與偕中更不克俱鴟梟鳴衡軛豺
狼當路衢蒼蠅間白黑讒巧令親疎欲還絕無蹊攬轡
止踟踟亦何留相思無終極秋風發微涼寒蟬鳴
我側原野何蕭條白日忽西匿歸鳥赴喬林一作木翩翩
厲羽翼孤獸走索羣銜草不遑食感物傷我懷撫心長
太息太息將何為天命與我違奈何念同生一往形不

歸孤魂翔故域

一作城

靈柩寄京師存者忽復

一作已

過亡

歿身自衰人生處一世去若朝露晞年在桑榆間影響

不能追自顧非金石咄嗒令心悲心悲動我神棄置莫

復陳丈夫志四海萬里猶比隣恩愛苟不虧在遠分日

親何必同衾憐然後展慙懃憂思成疾疢

一作疾

無乃兒

女仁倉卒骨肉情能不懷苦辛苦辛何慮思天命信可

疑虛無求列仙松子久吾欺變故在斯須百年誰能持

離別永無會執手將何時王其愛玉體俱享黃髮期收

淚卽長路援筆從此辭

贈丁廩

嘉賓填城闕豐膳出中厨吾與二三子曲宴此城隅秦
箏發西氣齊瑟揚東謳肴來不虛歸觴至反無餘我豈
狎異人朋友與我俱大國多良材譬海出明珠君子義
休倚小人德無儲積善有餘慶榮枯立可須滔蕩固大
節世俗多所拘君子通大道無願為世儒

朔風

仰彼朔風用懷魏都願騁代馬倏忽北徂凱風永至思
彼蠻方願隨越鳥翻飛南翔四氣代謝懸景運周別如
俯仰脫若三秋昔我初遷朱華未希今我旋止素雪云
飛俯降千仞仰登天阻風飄蓬飛載離寒暑千仞易陟
天阻可越昔我同袍今永乖別子好芳草豈忘爾貽繁
華將茂秋霜悴之君不垂眷豈云其誠秋蘭可喻桂樹
冬榮絃歌蕩思誰與銷憂臨川慕思何為泛舟豈無和
樂游非我鄰誰忘汎舟愧無榜人

矯志

芝桂雖芳難以餌烹尸位素餐難以成名磁石引鐵於
金不連大朝舉士愚不聞焉抱壁塗乞無為貴寶履仁
遘禍無為貴道駕雞遠害不羞卑棲靈虬避難不耻汚
泥都蔗雖甘杖之必折巧言雖美用之必滅濟濟唐朝
萬邦作孚逢蒙雖巧必得良弓聖主雖知必得英雄螳
螂見嘆齊士輕戰越王軼蛙國以死獻道遠知驥世偽
知賢覆之幬之順天之矩澤如凱風惠如時雨口為禁

閨舌為發機門機之關楛矢不追

閨情二首

攬衣出中閨逍遙步兩楹閒房何寂寞綠草被階庭空

穴

一作室

自生風百鳥翔南征春思安可忘憂戚與君并

佳人在遠道妾身單且莞歡會難再逢

一作過

芝蘭不重

榮人皆棄舊愛君豈忘平生寄松為女蘿依水如浮萍

齋身奉衿帶朝夕不墮

一作憤

傾儻終顧盼恩

一作儻願終盼睇

永副我中情

有一美人被服織羅妖姿艷麗
蒼若春華紅顏韡曄雲
髻嗟峨彈琴撫節為我絃歌清濁齊均既亮且和取樂
今日遑恤其他

三良

功名不可為忠義我所安秦穆先下世三臣皆自殘生
時等榮樂既沒同憂患誰言捐軀易殺身誠獨難攬涕
登君墓臨穴仰天歎長夜何冥冥一往不復還黃鳥為
悲鳴哀哉傷肺肝

責躬

於穆顯考時惟武皇受命于天寧濟四方朱旗所拂九
土披攘玄化滂流荒服來王超商越周與唐比蹤篤生
我皇奕世載聰武則肅烈文則時雍受禪于漢君臨萬
邦萬邦既化率由舊則廣命懿親以藩王國帝曰爾侯
君茲青土奄有海濱方周于魯車服有輝旗章有叙濟
濟雋乂我弼我輔伊爾小子恃寵驕盈舉挂時網動亂
國經作藩作屏先軌是隳傲我皇使犯我朝儀國有典

刑我削我黜將寘于理元克是率明明天子時惟篤類
不忍我刑暴之朝肆違彼執憲哀予小子改封充邑于
河之濱股肱弗置有君無臣荒淫之闕誰弼余身煢煢
僕夫于彼冀方嗟予小子乃惟斯殃赫赫天子恩不遺
物冠我玄冕要我朱紱光光天使我榮我華剖符授玉
王爵是加仰齒金璽俯執聖策皇恩過隆祇承怵惕咨
我小子頑克是嬰逝慙陵墓存愧闕庭匪敢傲德寔思
是恃威靈改加足以沒齒昊天罔極生命不圖常懼顛

沛抱罪黃壚願蒙矢石建旗東嶽庶立毫釐微功自贖
危軀授命知足免戾甘赴江湘奮戈吳越天啓其衷得
會京畿遲奉聖顏如渴如飢心之云慕愴矣其悲天高
聽卑皇肯照微

情詩

微陰翳陽景清風飄我衣游魚潛綠水翔鳥薄天飛眇
眇客行士遙役不得歸始出嚴霜結今來白露晞遊子
嘆黍離處者歌式微慷慨對嘉賓悽愴內傷悲

妬

嗟爾同衾曾不是志寧彼冶容安此妬忌

芙蓉池

逍遙芙蓉池翩翩戲輕舟南楊雙栖鵠北柳有鳴鳩

雜詩

悠悠遠行客去家千餘里出亦無所之入亦無所止浮
雲翳日光悲風動地起

言志

慶雲未時興雲龍潛作魚神鸞失其儔還從燕雀居

七步詩

煮豆燃豆其豆在釜中泣本是同根生相煎何太急

曹子建集卷五

欽定四庫全書

曹子建集卷六

魏 曹植 撰

瑩篋引

署酒高殿上親友從我遊中厨辦豐膳烹羊宰肥牛秦
箏何慷慨齊瑟和且柔陽阿奏竒舞京洛出名謳樂飲
過三爵緩帶傾庶羞主稱千金壽賓奉萬年酌久要不
可忘薄終義所尤謙謙君子德磬折欲何求驚風飄白

日光景馳西流盛時不再來百年忽我道生存華屋處零
落歸山丘先民誰不死知命復何憂

升天行二首

乘蹻追術士遠之蓬萊山靈液飛素波蘭桂上參天玄
豹遊其下翔鷗戲其巔乘風忽登舉彷彿見衆仙

扶桑之所出乃在朝陽谿中心凌蒼昊布葉蓋天涯日
出登東幹既夕沒西枝願得紆陽轡回日使東馳

僊人篇

僊人攬六著對博太山隅湘娥拊琴瑟秦女吹笙竽玉
樽盈桂酒河伯獻神魚四海一何局九州安所如韓終
與王喬要我於天衢萬里不足步輕舉凌太虛飛騰踰
景雲高風吹我軀迴駕觀紫微與帝合靈符閭闔正嵯
峨雙闕萬丈餘玉樹扶道生白虎夾門樞驅風遊四海
東過王母廬俯觀五嶽間人生如寄居潛光養羽翼進
趨且徐徐不見軒轅氏乘一作龍出鼎湖徘徊九天上
與爾長相須

妾薄命二首

携玉手喜同車北上雲閣飛除釣臺蹇產清虛池塘觀
沼可娛仰汎龍舟綠波俯擢神草枝柯想彼宓妃洛河
退詠漢女湘娥

日月既逝西藏更會蘭室洞房華燈步障舒光皎若日
出扶桑促樽合坐行觴主人起舞盜盤能者穴觸別端
騰觚飛爵闌干同量等色齊顏任意交屬所歡朱顏發
外形蘭袖隨禮容極情妙舞僂僂體輕裳解履遺絕纓

俛仰笑喧無呈覽持佳人玉顏齊舉金爵翠盤手形羅
袖良難腕弱不勝珠環坐者歎息舒顏御中裊粉君傍
中有霍納都梁鷄舌五味雜香進者何人齊姜恩重愛
深難忘召延親好宴私但歌盃來何遲客賦既醉言歸
主人稱露未晞

白馬篇

白馬飾金羈連翩西北馳借問誰家子幽并游俠兒少
小去鄉邑揚聲一作名沙漠垂宿昔乘良弓楛矢何參差

控弦破左的右發摧月支仰手接飛猱

疑作鴻

俯身散馬

蹄狡捷過猴猿勇剽若豹螭邊城多警急虜騎

一作胡虜數

遷移羽檄從北來厲馬登高堤長驅蹈匈奴左顧陵鮮

卑棄身鋒刃端性命安可懷父母且不顧何言子與妻

名在

一作編

壯士籍不得中顧私捐軀赴國難視死忽如

歸

名都篇

名都多妖女京洛出少年寶劍直千金被服麗且鮮關

雞東郊道走馬長楸間馳騁未能半雙兔過我前攬弓
捷鳴鏑長驅上南山左挽因右發一縱兩禽連餘巧未
及展仰手接飛鳶觀者咸稱善衆工歸我妍我歸宴平
樂美酒斗十千膾鯁胎鰕炮鼈炙熊蹯鳴儔嘯匹侶
列坐竟長筵連翩擊鞠壤巧捷惟萬端白日西南馳光
景不可攀雲散還城邑清晨復來還

薤露行

天地無窮極陰陽轉相因人居一世間忽若風吹塵願

得展功勤輸力於明君懷此王佐才慷慨獨不羣鱗介
尊神龍走獸宗麒麟蟲獸猶知德何況於士人孔氏刪
詩書王業粲已分騁我徑寸翰流藻垂華芬

豫章行二首

窮達難豫圖禍福信亦然虞舜不逢堯耕耘處中田太
公未遭文漁釣終渭川不見魯孔子窮困陳蔡間周公
下白屋天下稱其賢

又

鴛鴦自朋

一作用

親不若比翼連他人雖同盟骨肉天性

然周公穆康叔管蔡則流言子臧讓千乘季札慕其賢

美女篇

美女妖且閑採桑岐路間柔條紛冉冉落葉何翩翩攘
袖見素手皓腕約金環頭上金爵釵腰佩翠琅玕明珠

交玉體珊瑚間玉

一作木

難羅衣何飄飄輕裾隨風還顧

盼遺光彩長嘯氣若蘭行徒用息駕休者以忘餐借問
女何居乃在城南端青樓臨大路高門結重關容華耀

朝日誰不希，令顏媒氏何所營。玉帛不時安，佳人慕高義。求賢良獨難，衆人徒嗷嗷。安知彼所觀，盛年處房室。中夜起長歎。

豔歌

出自薊北門，遙望湖池桑。枝枝自相值，葉葉自相當。

遊僊

人生不滿百，歲歲少歡娛。意欲奮六翮，排霧凌紫虛。蟬蛻同松喬，翻跡登鼎湖。翱翔九天上，騁轡遠行遊。東觀

扶桑曜西臨弱水流
北極玄天渚南翔陟丹丘

五遊詠

九州不足步願得凌雲翔
逍遙八紘外游目歷遐荒
披我丹霞衣襲我素霓裳
華蓋芬晻藹六龍仰天驤
曜靈未移景倏忽造昊蒼
閭闔啓丹扉雙闕曜朱光
徘徊文昌殿登陟太微堂
上帝休西櫺羣后集東廂
帶我瓊瑤佩漱我沆瀣漿
踟躕玩靈芝徙倚弄華芳
王子奉僊藥羨門進竒方
服食享遐紀延壽保無疆

梁甫行

一云泰山梁甫行

八方各異氣千里殊風雨劇哉邊海民寄身於草墅妻
子象禽獸行止依林阻柴門何蕭條狐兔翔我宇

丹霞蔽日行

紂為昏亂虐殘忠正周室何隆一門三聖牧野致功天
亦革命漢祚之興秦階之衰雖有南面王道陵夷炎光
再幽殄滅無遺

怨歌行

為君既不易為臣良獨難忠信事不顯乃有見疑患周
公佐成王金滕功不刊推心輔王室二叔反流言待罪
居東國泣涕常流連皇靈大動變震雷風且寒拔樹偃秋
稼天威不可干素服開金滕感悟求其端公旦事既顯
成王乃哀嘆吾欲竟此曲此曲悲且長今日樂相樂別
後莫相忘

善哉行

來日大難口燥唇乾今日相樂皆當喜歡經歷名山芝

草翩翩仙人王喬奉藥一丸自惜袖短內手知寒慙無
靈輒以救趙宣月沒參橫北斗闌干親友在門飢不及
餐

君子行

君子防未然不處嫌疑間瓜田不納履李下不整冠叔
嫂不親授長幼不並肩和光得其柄謙恭甚獨難周公
下白屋吐哺不及餐一沐三握髮後世稱聖賢

平陵東

閶闔開天衢通被我羽衣乘飛龍乘飛龍與僊期東上
蓬萊採靈芝靈芝採之可服食年與王父無終極

苦思行

綠羅緣玉樹光耀燦相暉下有兩真人舉翅翻高飛我
心何踊躍思欲攀雲追鬱鬱西嶽巔石室青青與天連
中有青年一隱士鬚髮皆皓然策杖從我遊教我忘
言

遠遊篇

遠遊臨四海俯仰觀洪波大魚若曲陵乘浪相經過靈
鼇戴方丈神嶽儼嵯峨仙人翔其隅玉女戲其阿瓊蕊
可療飢仰首吸朝霞崑崙本吾宅中州非我家將歸謁
東父一舉超流沙鼓翼舞時風長嘯激清歌金石固易
弊日月同光華齊年與天地萬乘安足多

吁嗟篇

吁嗟此轉蓬居世何獨然長去本根逝宿夜無休閒東
西經七陌南北越九阡卒遇回風起吹我入雲間自謂

終天路忽然下沉泉驚颺接我出故歸彼中田當南而
更北謂東而反西宕若當何依忽亡而復存飄飄周八
澤連翩歷五山流轉無恒處誰知吾苦艱願為中林草
秋隨野火燔糜滅豈不痛願與株荻連

鰕鮒篇

鰕鮒游潢潦不知江海流燕雀戲藩柴安識鴻鵠游世

士誠明性

一作世事
此誠明

大德固無儔駕言登五嶽然後小

陵丘俯觀上路人勢利惟是謀讎高念皇家遠懷柔九

金少卿八卷六
州撫劍而雷音猛氣縱橫浮汎泊徒嗷嗷誰知壯士憂
種菖篇

種菖南山下菖菑自成陰與君初婚時結髮恩意深
愛在枕席宿昔同衾竊慕棠棣篇好樂如瑟琴行年
將晚莫佳人懷異心思絕曠不接我情遂抑沉出門當
何顧徘徊步北林下有交頸獸仰見雙栖禽攀枝長歎
息淚下沾羅衿良馬知我悲延頸對我吟昔為同池魚
今為商與參往古皆懽遇我獨困於今棄置委天命悠

悠安可任

浮萍篇

浮萍寄清水隨風東西流結髮辭嚴親來為君子仇恪
勤在朝夕無端獲罪尤在昔蒙恩惠和樂如瑟琴何意
今摧顏曠若商與參茱萸自有芳不若桂與蘭新人雖
可愛不若故人歡行雲有反期君恩儻中還慙慙仰天
歎愁心將何愬日月不恒處人生忽若寓悲風來入帷

懷一作

淚下如垂露散

一作發

篋造新

一作裳

衣裁縫紈與素

惟漢行

太極定二儀清濁始以形三光照八極天道甚著明為
人立君長欲以遂其生行仁章以瑞變故誠驕盈神高
而聽卑報若響應聲明主敬細微三季晉天經二皇稱
至化盛哉唐虞庭禹湯繼厥德周亦致太平在昔懷帝
京日昃不敢寧濟濟在公朝萬載馳其名

當來日大難

日苦短樂有餘乃置玉樽辦東厨廣情故心相於闔門

置酒和樂欣欣遊馬後來轅車解輪今日同堂出門異
鄉別易會難各盡杯觴

野田黃雀行

高樹多悲風海水揚其波利劍不在掌結友何須多不
見籬間雀見鷄自投羅羅家得雀喜少年見雀悲拔劍
捐羅網黃雀得飛飛飛摩蒼天來下謝少年

門有萬里客

門有萬里客問君何鄉人褰裳起從之果得心所親挽

衣對我泣太息前自陳本是朔方士今為吳越民行行
將復行去去適西秦

怨歌行一首七解晉曲所奏

明月照高樓流光正徘徊上有愁思婦悲嘆有餘哀

解一

借問嘆者誰自云宕子妻夫行踰十載賤妾常獨棲

解二

念君過於渴思君劇於飢君為高山栢一作妾為濁水

泥解三

北風行蕭蕭烈烈入吾耳心中念故人淚墮不能止

解四

浮沉各異路會合當何諧願作東北風吹我入君懷

五解

君懷常不開賤妾當何依恩情中道絕流止任東西

六解

我欲竟此曲此曲悲且長今日樂相樂別後莫相忘

七解

桂之樹行

桂之樹桂之樹桂生一何麗佳揚朱華而翠葉流芳布
天涯上有棲鸞下有蟠螭桂之樹得道之真人咸來會
講僊教爾服食日精要道甚省不煩淡泊無為自然乘
蹻萬里之外去留隨意所欲存高高上際於衆外下下

乃窮極地天

當墻欲高行

龍欲升天須浮雲人之仕進待中人衆口可以鑠金讒
言三至慈母不親憤憤俗間不辨偽真願欲披心自說
陳君門以九重道遠河無津

當欲遊南山行

東海廣且深由卑下百川五嶽雖高大不逆垢與塵良
木不十圍洪條無所因長者能博愛天下寄其身大匠

無棄材船車用不均錐刀各異能何所獨卻前嘉善而
矜愚大聖亦同然仁者各壽考四坐咸萬年

當事君行

人生有所貴尚出門各異情朱紫更相奪色雅鄭異音
聲好惡隨所愛憎追舉逐聲名百心可事一君巧詐寧
拙誠

當車以駕行

歡坐玉殿會諸貴客侍者行觴主人離席顧視東西廂

絲竹與鞞鐸不醉無歸來明燈以繼夕

飛龍篇

晨遊太山雲霧窈窕忽逢二童顏色鮮好乘彼白鹿手

翳芝草我知真人長跪問道西登玉堂

一作臺

金樓複道

授我僊藥神皇所造教我服食還精補腦壽同金石永
世難老

盤石篇

盤石山巔石飄飄澗底蓬我本泰山人何為客淮東兼

葭彌斥土林木無芬重岬巖若崩缺湖水何洶洶蚌蛤
被濱涯光彩如錦虹高彼凌雲霄浮氣象螭龍鯨脊若
丘陵鬚若山上松呼吸吞船櫂彭澤戲中鴻方舟尋高
價珍寶麗以通一舉必千里乘颶舉帆幢經危履險阻
未知命所鍾常恐沈黃壚下與鼃鼈同南極蒼梧野游
盼窮九江中夜指參辰欲師當定從仰天長太息思想
懷故邦乘桴何所志吁嗟我孔公

驅車篇

驅車揮鷲馬東到奉高城神哉彼泰山五嶽專其名隆
高貫雲蜺嵯峨出太清周流二六侯間置十二亭上有
涌醴泉玉石揚華英東北望吳野西眺觀日精魂神所
繫屬逝者感斯征王者以歸天效厥元功成歷代無不
遵禮記有品程探策或長短唯德享利貞封者七十帝
軒皇元獨靈餐霞漱沆瀣毛羽被身形發舉蹈虛廓徑
庭升窈冥同壽東父年曠代永長生

曹子建集卷六

欽定四庫全書

集部

曹子建集卷七至十

詳校官監察御史臣曹錫寶

檢討臣何思鈞覆勘

總校官庶吉士臣倉聖脉

校對官編修臣繆晉

騰錄監生臣方春澍

欽定四庫全書

曹子建集卷七

皇子生頌

魏 曹植 撰

於聖我后憲章前志克纂二皇三靈昭事祇肅郊廟明德敬惠潛和積善鍾天之釐嘉月令辰篤生聖嗣慶由一人萬國作憲喁喁萬國友友羣生稟命我后綏之則榮長為臣職終天之經仁聖奕代永載明明同年上帝

休祥淑禎藩臣作頌光流德聲吁嗟卿士祇承予聽

玄俗頌

玄俗妙識飢餌神頽在陰脩逝即陽無景逍遙北嶽凌
霄引領揮霧昊天含神自靜

母儀頌

殷湯令妃有莘之女仁教內脩度義以處清謚后宮九
嬪有序伊為媵臣遂作元輔

明賢頌

於鏢姜后光配周宣非禮不動非禮不言晏起失朝永
巷告愆王用勤政萬國以虔

學宮頌

修復舊廟豐其薨宇莘莘學徒爰居爰處王教既備羣
小溢沮魯道以興永作憲矩洪聲登遐神祇來祐休徵
雜沓瑞我邦家內光區域外被荒遐

孔廟頌

自五帝典絕三皇禮廢應期命世齊賢等聖者莫

高於孔子也故有若曰出乎類拔乎萃誠所謂性與
天道不可得而聞矣

由也務學名在前志宰予晝寢糞土作誠過庭子弟詩
禮明記歌以詠言文以騁志予今不述后賢曷識於鑠
尼父生民之傑性與天成該聖備藝德倫三五配皇作
烈玄鏡獨鑑神明昭晰仁塞宇宙志凌雲霓學者三千
莫不俊乂唯仁是憑惟道足恃鑽仰彌高請益不已

社頌

於惟太社官名后土是曰勾龍功著上古德配帝王實
為靈主克明播植農正日舉尊以作稷豐年是與義與
社同方神北宇建國承家莫不攸叙

宜男花頌

草號宜男既曄且貞其貞伊何惟乾之嘉其曄伊何綠
葉丹花光采晁曜配彼朝日君子耽樂好和琴瑟固作
螽斯惟立孔臧福濟太姒永世克昌

冬至獻襪頌

玉趾既御履和蹈貞行與祿邁動以祥并南闕北戶西
巡王城翱翔萬域聖體浮輕

庖犧贊

木德風姓八卦創焉龍瑞官名法地象天庖厨祭祀網
罟魚畋琴瑟以像時神通玄

女媧贊

古之國君造簧作笙禮物未就軒轅纂成或云二皇人
首蛇形神化七十何德之靈

神農贊

少典之胤火德成木造為耒耜導民播穀正為雅琴以
暢風俗

黃帝贊

少典之孫神明聖哲土德承火赤帝是滅服牛乘馬衣
裳是制氏雲名官功冠五帝

少昊贊

祖自軒轅青陽之裔金德承土儀鳳帝世官鳥號名殊

職別系農正扈氏各有品制

顓頊贊

昌意之子祖自軒轅始誅九黎水德統天以國為號風
化神宣威暢八極靡不祇虔

帝嚳贊

祖自軒轅玄囂之裔生言其名才德帝世撫寧天地神
聖靈察教彌四海明並日月

帝堯贊

大德統位父則高辛克平共工萬國同塵調適陰陽其
惠如春巍巍成功配天則神

帝舜贊

顓頊之族重瞳神聖克協頑瞽應唐涖政除凶舉俊以
齊七政應歷受禪顯天之命

夏禹贊

吁嗟天子拯世濟民克卑宮室致孝鬼神蔬食薄服黻
冕乃新厥德不回其誠可親疊疊其德温温其人尼稱

無間何德之純

殷湯贊

殷湯代夏諸侯振仰放桀鳴條南面以王桑林之禱炎
灾克償伊尹佐治可謂賢相

湯禱桑林贊

惟殷之世炎旱七年湯禱桑林祈福于天翦髮離爪自
以為牲皇靈感應時雨以零

周文王贊

於赫聖德實惟文王三分有二猶服事商化加虞芮傍
暨四方王業克昭武嗣遂光

周武王贊

桓桓武王繼世滅殷咸任尚父且作商臣功冒四海救
世濟民天下宗周萬國是賓

周公贊

成王即位年尚幼稚周公居攝四海慕利罰叛柔服祥
應仍至誦長反政達天忠義

周成王贊

成王繼武賢聖保傅年雖幼稚岐嶷有素初疑周公終
焉克寤旦奭佐治遂致刑錯

漢高帝贊

屯雲斬蛇靈母告祥朱旗既抗九野披攘禽嬰克羽掃
滅英雄承機帝世功著武湯

漢文帝贊

孝文即位愛物儉身驕吳撫越匈奴和親納諫赦罪以

德讓民殆至刑錯萬國化淳

漢武帝贊

世宗光光文武是攘威振百蠻恢拓土疆簡定律歷辯
修舊章封天禪土功越百王

漢景帝贊

景帝明德繼文之則肅清王室克滅七國省役薄賦百
姓殷昌風移俗易齊美成康

姜嫄簡狄贊

嘗有四妃子皆為天帝摯且崩堯承天綱玄鳥大跡殷
周美祥稷契既生翊化虞唐

禹妻贊

禹娶塗山土功是急惟啓之生過門不入女嬌達義明
勲是執成長望嗣天祿以襲

班婕妤贊

有德有言實惟班婕妤盈冲其驕窮其厭悅在夷艱貞在
晉三接臨颺端幹衝霜振葉

吹雲贊

天地變化是生神物吹雲吐潤浮雲蒼鬱

赤雀贊

西伯積德天命攸顧赤雀銜書爰集昌戶瑞為天使和氣所致嗟爾後王昌期而至

巢父贊

堯禪許由巢父是耻穢其溷聽臨河洗耳池主是讓以水為濁嗟此三士清足厲俗

務光贊

湯將伐桀謀於卜子既聞讓位隨以為耻薄於殷世著
自汙已自投潁水清風邈矣

商山四皓贊

嗟爾四皓避秦隱形劉項之爭養志弗營不應朝聘保
節全貞應命太子漢嗣以寧

三鼎贊

鼎質之精古之神器黃帝是鑄以像太乙能輕能重知

凶識吉世衰則隱世和則出

承露盤銘

明帝鑄承露盤莖長十二丈大十圍上盤逕四尺下盤
逕五尺銅龍達其根龍身長一丈背負兩子自立於
上林園甘露乃降使臣為頌銘銘曰

岵岵承露峻極太清神君礪魄洪基嶽停下潛醴泉上
受雲英和氣四充翔風所經匪我明君孰能經營近厯
躔度三光朗明珠俗歸義祥瑞混并鸞鳳晨棲甘露宵

金史卷之七
卷七
零神物攸協高而不傾奉天戴魏恭統神器固若露盤
長存永貴賢聖繼跡奕世明德不忝先功保茲皇極垂
作億兆永荷天秩

寶刀銘

造茲寶刀既礪既礪匪以尚武予身是衛麟角是觸鸞
距匪蹶

曹子建集卷七